

*MASTER  
NEGATIVE  
NO. 92-81127-12*

MICROFILMED 1993

COLUMBIA UNIVERSITY LIBRARIES/NEW YORK

as part of the  
"Foundations of Western Civilization Preservation Project"

Funded by the  
NATIONAL ENDOWMENT FOR THE HUMANITIES

Reproductions may not be made without permission from  
Columbia University Library

# **COPYRIGHT STATEMENT**

**The copyright law of the United States - Title 17, United States Code - concerns the making of photocopies or other reproductions of copyrighted material.**

**Under certain conditions specified in the law, libraries and archives are authorized to furnish a photocopy or other reproduction. One of these specified conditions is that the photocopy or other reproduction is not to be "used for any purpose other than private study, scholarship, or research." If a user makes a request for, or later uses, a photocopy or reproduction for purposes in excess of "fair use," that user may be liable for copyright infringement.**

**This institution reserves the right to refuse to accept a copy order if, in its judgement, fulfillment of the order would involve violation of the copyright law.**

*AUTHOR:*

REHBRONN, ENGELBERT

*TITLE:*

DE INTERPOLATIONIBUS  
QUAE FERUNTUR...

*PLACE:*

ROSTOCHII

*DATE:*

1875

Master Negative #

92-81127-12

COLUMBIA UNIVERSITY LIBRARIES  
PRESERVATION DEPARTMENT

BIBLIOGRAPHIC MICROFORM TARGET

Original Material as Filmed - Existing Bibliographic Record

88HV  
DZ8  
v.2

Rehbronn, Engelbert  
De interpolationibus quae feruntur in Odysseâe  
libro undecimo. Dissertatio inauguralis quam ...  
scripsit Engelbertus Rehbronn ... Rostôchii,  
Boldt, 1875.  
33 p. 21 $\frac{1}{2}$  cm.

Thesis, Rostock.  
Volume of pamphlets

19419

Restrictions on Use:

TECHNICAL MICROFORM DATA



FILM SIZE: 35  
IMAGE PLACEMENT: IA IA IB IIB  
DATE FILMED: 3-1-93 INITIALS Susm  
FILMED BY: RESEARCH PUBLICATIONS, INC WOODBRIDGE, CT



**AIIM**

**Association for Information and Image Management**


1100 Wayne Avenue, Suite 1100  
Silver Spring, Maryland 20910  
301/587-8202




**Centimeter**




**Inches**




MANUFACTURED TO AIIM STANDARDS  
BY APPLIED IMAGE, INC.









88HV  
EZ6 No. 1  
DE INTERPOLATIONIBUS  
QUAE FERUNTUR  
IN ODYSSEÆ LIBRO UNDECIMO.

DISSERTATIO INAUGURALIS

QUAM

AUCTORITATE

AMPLISSIMI PHILOSOPHORUM ORDINIS

IN ACADEMIA ROSTOCHIENSI

SUMMOS IN PHILOSOPHIA HONORES

RITE CONSEUTUS

SCRIPSIT

ENGELBERTUS REIBRONN

MAGISTER GYMNASII CULMENSIS.

ROSTOCHII.

TYPIS EXPRESSIT CAROLUS BOLDT.

MDCCLXXV.



88 H V  
DZ8

✓ 2

Nov. 14, 1921, 6M

## Praefatio.

Multas interpolationes et in Iliade et in Odyssea inesse, cujus rei certissimum testimonium habemus et in doctis doctorum Alexandrinorum annotationibus et in accuratis virorum critices peritissimorum disquisitionibus, nemo hodie jam negare audeat. Ut autem cognoscamus, quomodo factum sit, ut interpolationes in carmina Homerica irreperent et in iis quasi inveterascerent, quum a proposito nostro non alienum sit, breviter rationem originis carminum quae nomine Homeri divulgabantur in memoriam nobis revocabimus. Apud Graecos ipsos illa carmina tanti aestimata sunt, ut etiam ex iis bona cum gratia inter diversas gentes controversiae componerentur atque omnibus erat persuasum, et Homerum ipsum vixisse eumque unum horum carminum fuisse auctorem, quem rhapsodum modo per omnes terras peregrinantem praedicarunt modo caecum fuisse fabulosae narrationi addiderunt. Nonnulli quidem grammatici, qui, quia omnes locos Homericos esse noluerunt, *οἱ χωρίζοντες*, appellabantur, dubitarunt, numHomerus omnino vixerit et illi Alexandrini, quorum princeps erat Aristarchus, multos versus posterioribus demum temporibus factos esse intellexerunt, sed nemo contra communem sententiam de vita et scriptis Homeri per multa saecula ita stabilitam ut non iam pervelli posse videretur, existere ausus est. Primus Fr. Aug. Wolfius partim virorum doctorum ab antiqua sententia argumentis tam invictis quae confutari nequeant reduxit, partim pugnam in has res novas incitavit; ab altera enim parte praecipue vidimus certantes

Wolfium<sup>1)</sup> et Lachmanium, ab altera Naegelsbachium et Nitzschium, qui unitatem carminum Homericorum defenderunt. Sed iam audiamus argumenta Wolfii, quibus demonstrare studuit, Homerum nunquam fuisse et carmina, quae dicuntur Homerica, non esse unius viri, sed multorum rhapsodorum, a quibus per multa saecula recitata multisque modis immutata fuerint.

Firmissimum argumentum Wolfius<sup>2)</sup> inde duxit, quod Homeri temporibus ars scribendi nondum nota fuerit, nam verba *γράφειν* et *χαράσσειν* et similia esse ex numero factitiorum (*ὄνοματοποιημένων*) et habere proprie fodiendi sc. scalpendi significationem; tum quod digamma tempore carminum concipiendorum scriptum fuerit, id quod ex hiatibus cognosci possit, carmina mutata fuisse demonstravit. Optime de digammate disseruit Peters.<sup>3)</sup> Deinde cedi posse negat, unum hominem haec omnia singula persequi posse ita ut eleganti sermonis consuetudini et reliquis recte scribendi legibus non sint contraria; quartum argumentum erat, quod complura inter se pugnantia reperiantur, quae multos auctores prodant. Nunc autem ipse quomodo carmina Homerica orta sint, explicare studebo, qua in re saepius mihi cum Wolfio conveniet. Jam antiquissimis temporibus quum Jones politioris cultus participes esse coeperunt, populus ipse res a maioribus suis feliciter gestas cantabat. Tum rhapsodi exstiterunt, qui per omnes Graeciae et Asiae partes iter faciebant et ubique carmina recitabant, quo factum est, ut propter singulas Graecorum gentes carmina immutarent et heroes in quacunque erant regione celebratos decantarent; nam ut Wolfius ait, ars *ἀοιδῶν* tum non minus peculiaris fuit, quam fabri aut figuli, quam medici aut harioli, honorem autem publice privatimque habuit longe maximum<sup>4)</sup>. Idem

<sup>1)</sup> Prolegomena ad Homerum sive de operum Homericorum prisca et genuina forma variisque mutationibus et probabili ratione emendandi scripsit Fr. Aug. Wolfius, Halis Saxonum 1795.

<sup>2)</sup> Wolf., l. c. pag. XLV.

<sup>3)</sup> Peters Quaestiones etymologicae et grammaticae de usu et vi digammatis ejusque immutationibus in lingua Graeca. Lips. 1864.

exemplum habemus apud Germanos, qui magnum quoque et clarum habemus carmen de Nibelungis, quod ex compluribus populi carminibus compositum et circa annum MCCX in unum corpus redactum esse Lachmannius<sup>1)</sup> demonstravit. Postea omnia illa carmina jam tota Graecia divulgata atque cognita vir politioris ingenii, cui nomen erat Homerus, ita conjunxit, ut narrationis perpetuae formam induerent, qua quum omnes contenti essent, in honorem auctoris Homerica appellabatur. De patria atque aetate Homeri disseruerunt B. Thierschius<sup>2)</sup> et Dugas-Montbellius,<sup>3)</sup> sed non habeo locum nec tempus de illorum sententiis disputandi. Quum complures rhapsodi illam conglutinationem non diligenter tuerentur, sed, ut iis videbatur, carmina Homerica aut minuerent aut augerent, Pisistratus, tyrannus Atheniensis, doctos viros, quorum notissimi nobis sunt Onomacritus, Zopyrus, Orpheus Crotoniates, e tota Graecia convocavit, ut genuinam et peculiarem carminum Homericorum formam restituerent. Illi viri id quod facere iussi erant omnibus approbantibus absolvere studebant, sed aliquoties ipsi quoque Pisistrato hortante nonnullos locos laudem Atheniensium celebrantes addiderunt, qua de re jam loquar dissertatione procedente. Quum igitur carmina Homerica paullatim tantum orta esse mihi probatum sit, multas discrepantias inesse et in Iliade et in Odyssea non mirum nobis videatur. Causas vero, cur complures in Iliade nec tam multae in Odyssea nobis legentibus occurrant repugnantiae, perfacile cognoscemus, si res et loca de quibus in ambobus carminibus agitur animo proponemus. In Iliade enim tota actio in parvo tantum spatio ad finem perducitur, contra in Odyssea is qui hoc carmine celebratur multis variisque locis versatur, ita ut alios homines aliaque loca commemorata inveniamus; in Iliade multi iidemque viri persaepe exsistunt, in Odyssea centum quidem proci uno loco agunt, sed plurimorum nomina

<sup>1)</sup> Lachmann, Zu den Nibelungen. Berlin, 1836.

<sup>2)</sup> B. Thiersch, Ueber das Vaterland und Zeitalter des Homer. Halberstadt 1832.

<sup>3)</sup> Dugas-Montbell, Histoire des poésies Homériques. Paris 1838.

omnino non appellantur. Sed maiores interpolationes jam ante Pisistratum factae sunt et ita fere, ut rhapsodi aut majores partes ex aliis carminibus desumerent aut libros largissimis suis accessionibus locupletarent, quae statim inde cognosci potuerunt, quod aut cum actione antecedenti aut cum personis antea commemoratis dissentiebant. Saepe etiam rhapsodi opiniones et imagines rerum, quae istis quidem temporibus, sed nondum vetustis cuique notae erant, carminibus adicebant fingentes aut tum jam heroum cultum fuisse aut viros aliter describentes ac postea in Graecia describebantur. Qui viri talem fraudem commiserunt, *διασκευασταί* appellati sunt, sed immerito. Wolfius<sup>1)</sup> eorum nomen ita explicat: *διασκευαστὰς* non ignotos quosdam auctores criticarum recensionum habendos esse, de quibus alia vocabula in usu sunt, sed exactores aut politores, qui vel una cum Pisistrato vel paullo post eidem operi manum admoverint. Quibus rebus praemissis quae mihi necessariae videbantur ad sententiam meam de Homero explanandam, quae etiam confirmatur, si quomodo carmina epica apud Esthones et Finnos orta sint reputamus, nunc propius ad propositum meum accedam.

### §. I.

#### De ratione et natura libri undecimi.

In maximam semper criticorum offensionem incurrit liber undecimus, quo de Ulixem non in Orcum descendente, sed prope Orcum morante agitur, id quod merito factum esse mihi videtur. Illud enim iter Ulixem suscepit Circe hortante, ut Tiresiam vatem consuleret lib. X. vers. 490—95:

*ἀλλ' ἄλλην χερὶ πρῶτον ὁδὸν τελέσαι καὶ ἰκέσθαι  
εἰς Ἄϊδα ο δόμους καὶ ἐπαινῆς Περσεφονείης,  
ψυχῇ χρησομένους Θηβαίου Τειρεσίαο,  
μάντιος ἀλαοῦ, τοῦτε γρόντες ἐμπεδοί εἰσιν.  
τῷ καὶ τεθνηῶτι νόον πόρε Περσεφόνεια  
οἷον πεπνῶσθαι· τοὶ δὲ σκιά ἀίσουσιν.*

<sup>1)</sup> Wolf, l. c. p. CLII.

Sed omnino intelligi non potest, cur Ulixes hoc periculosum iter inire debuerit, praesertim quum Circe eum ad se redire jubeat, quae postea in libro XII. omnia pericula narrat, quae postea ei subeunda erant. Nonne Circe statim quae sciebat dicere potuit, quum Tiresias nihil de itinere quod magni esset momenti diceret, sed etiam Ulixem in patriam reversum alia itinera facere quam utilissimum putaret? Ulixes quidem Penelopen de ea re certiore farit lib. XXIII. v. 248 et 268, sed eum postea denuo iter suscepisse nusquam legimus.

Tiresias ergo non respondet, quomodo Ulixes via certissima domum venire possit, sed mentione Trinacriae excepta quid in Ithaca agatur narrat et tum suadet, qua ratione spectra et a sanguine arcere et cum iis colloqui possit. Haec est summa totius libri aliaque quaecunque antecedunt narrationi eamque subsequuntur, ad narrationem hujus fabulae augendam atque producendam addita sunt. Respicendae quoque sunt discrepantiae nonnullae cum sequentibus libris conspicuae; nam in libro XI. v. 115 Tiresias Ulixem procos in domo inventurum esse pronuntiat, cujus vaticinii ipse iam oblitus esse videtur in versu 383 libri XIII:

*ὦ πόνοι, ἦ μάλα δὴ Ἀγαμέμνωνος Ἀτρεΐδαι  
φθίσσεσθαι κακὸν οἶτον ἐνὶ μεγάροισιν ἐμελλον,  
εἰ μή μοι σὺν ἑκάστα, θεὰ, κατὰ μοῖραν ἔειπες.*

Sed hac de re uberius in singulis locis explicandis disseram, hic tantum commonefaciam, in libro XI. qui *Nexvia* appellabatur, diversas inesse opiniones ab iis quae temporibus carminum Homericorum nondum scriptorum valuerunt. Tum nondum mortales in numero deorum reponi posse putabantur, cujus rei contrariam sententiam invenimus v. 300, ubi dioscuroi et v. 601, ubi Hercules divini honoris participes fuisse praedicantur. Nec minus mirum videtur, apud Homerum homines sceleratos etiamsi mortui sint poenis affligi. Summa poena habebatur, si homines propter ὕβριν aut per vitam maximis malis afficiebantur aut etiam morte mulcebantur, sed opinio, homines mortuos scelerum in vita perpetratorum

poenas dare, posteriorum demum est temporum. Quam ob rem Minos animas in Orcum venientes non iudicat, sed lites tantum in Orco inter singulas componit. Permulti exstant loci, qui a diis homines vivos puniri demonstrant, ut Od. II, 135. XV, 232. XVIII, 475. XIX, 78 et II. XIX, 87. IX, 454, 568, 571 et locum, quo homines morte sola puniuntur, invenimus in Od. IV. v. 502 — 10, ubi Ajax Locrensis propter superbe dicta a Neptuno interfectus est. Nusquam Homerus poenae in Orco sustinendae meminit exceptis duobus Iliadis locis, XIX, 260 et III, 278, qui spurii sunt et ubi participium *καμόντας* interpolatum esse constat. Praeterea heroes, qui aliis locis fortissimi omnium Graecorum praedicantur, hic ita apparent, ut mulieres, non viros loquentes audire videamur. Quod si quaerimus, cur Homerus uxores heroum, non heroes ipsos primum ad foveam accedentes faciat non contenti sumus Nitzschio<sup>1)</sup> respondente, id factum esse, quia Homero tales *κατάλογοι γυναικῶν* ante oculos fuerint. Immo inde quod apud Hesiodum similes catalogos nec non in *Νόστοις*, cuius rei meminit Paus. X, 28. 4., invenimus, totam Necyiam recentioris aetatis notam prae se ferre concludere debemus. Primitus in Boeotia, ubi tales mortuorum citationes notae et usitatae erant, hanc necyiam ortam verisimile est et tum aliis carminibus Homericis, quae Ulixem Tiresiam consulentem praedicarunt, affixam esse. Quo tempore autem id factum sit, certiores fieri non possumus, quum nihil certi testimonii hac de re habeamus. Friedlaenderus<sup>2)</sup> obiter hanc quaestionem tangens ita sentit:

„Zum Beispiel kann das ganze elfte Buch sehr wohl ein Zusatz — wenn auch vielleicht des ersten Dichters — sein, da Odysseus eigentlich ohne jede Veranlassung in die Unterwelt hinabsteigt“. Id certe constat, maiorem interpolationem, cui postea minores interpolationes adjectae sunt, jam ante Pisistrati tempora factam esse. Nam tum quum Theagenes Rheginus inter-

<sup>1)</sup> Nitzschius in comm. ad Odysseam p. 191.

<sup>2)</sup> Dr. Ludwig Friedländer, Die homerische Kritik von Wolf bis Grote. Berlin, 1853.

pretationes allegoricas Homeri, Hipponax parodias Homericas scripserunt, maiores interpolationes non iam irrepere potuerunt, sed ex illo tempore carmina Homerica ut in antiquissima sua integritate servarentur, et publice et a viris doctis cautum est, quam ob rem mihi non arridet sententia Ciceronis, qui de Orat. 3, 34, 137: Pisistratus, inquit, primus Homeri libros confusos antea, sic disposuisse dicitur, ut nunc habemus. —

## §. II.

### De situ Orci.

Consideratis versibus 490 — 91 libri X:

*καὶ ἰκίσσεται εἰς Αἴδαο δόμους*

Ulixem in Orcum ipsum descendisse opinabimur, sed re vera id non fecit. Ut postea Graeci tartarum media in parte terrae esse opinabantur, cuius fidei exemplum videmus apud Aeschylum in choro Eumenidum v. 253 — 255:

*μέγας γὰρ Αἰδῆς ἐστὶν εὐθύνος βροτῶν ἐνερθε  
χθονός, δειτογράφῳ δὲ πάντ' ἐπωπῆ φρενί,*

sic etiam Homeri temporibus eadem erat sententia. Ulixes enim supra terram remansit, quum foveam faceret eique infunderet sanguinem, quo alliceret spectra. Quod quam vere dictum sit, etiam magis lucebit respecto versu 150 libri XI, ubi Tiresiam *δόμον Αἰδὸς εἶσω* ivisse legimus et vers. 627, ubi Herculem idem fecisse narratur. Ulixes ergo id quod Circe suaserat efficere non potuit, quum prope Orcum tantum proficisci posset. Quod quum intellexerimus, nobis erit magno usui perlustrantibus praecipue illos locos hujus libri, quibus Ulixes viros in Orco ipso cruciatos conspexisse dicitur. Ut autem Ulixes ad inferos veniret, regionem ad occidentem sitam petere debuit, in qua *Κερβεῖοι* aut *Κυμῆτιοι* h. e. viri caliginis habitabant, et in quorum finibus introitus Orci erat, sed paullo post tam longum iter non fuisse necessarium videbimus. Fr. Aug. Wolfius<sup>1)</sup> enim contendit, in Iliade regnum infernum sub terra jacens depingi, in Odyssea autem in extremo occidenti supra Oceanum, cui

<sup>1)</sup> Wolf, Vorles. über Gesch. der Griech. Liter. p. 180.

poenas dare, posteriorum demum est temporum. Quam ob rem Minos animas in Orcum venientes non iudicat, sed lites tantum in Orco inter singulas componit. Permulti exstant loci, qui a diis homines vivos puniri demonstrant, ut Od. II, 135. XV, 232. XVIII, 475. XIX, 78 et II. XIX, 87. IX, 454, 568, 571 et locum, quo homines morte sola puniuntur, invenimus in Od. IV. v. 502 — 10, ubi Ajax Locrensis propter superbe dicta a Neptuno interfectus est. Nusquam Homerus poenae in Orco sustinendae meminit exceptis duobus Iliadis locis, XIX, 260 et III, 278, qui spurii sunt et ubi participium *καμόντας* interpolatum esse constat. Praeterea heroes, qui aliis locis fortissimi omnium Graecorum praedicantur, hic ita apparent, ut mulieres, non viros loquentes audire videamur. Quod si quaerimus, cur Homerus uxores heroum, non heroes ipsos primum ad foveam accedentes faciat non contenti sumus Nitzschio<sup>1)</sup> respondente, id factum esse, quia Homero tales *κατάλογοι γυναικῶν* ante oculos fuerint. Immo inde quod apud Hesiodum similes catalogos nec non in *Νόστοις*, ejus rei meminit Paus. X, 28. 4., invenimus, totam Necyiam recentioris aetatis notam prae se ferre concludere debemus. Primitus in Boeotia, ubi tales mortuorum citationes notae et usitatae erant, hanc necyiam ortam verisimile est et tum aliis carminibus Homericis, quae Ulixem Tiresiam consulentem praedicarunt, affixam esse. Quo tempore autem id factum sit, certiores fieri non possumus, quum nihil certi testimonii hac de re habeamus. Friedlaenderus<sup>2)</sup> obiter hanc quaestionem tangens ita sentit:

„Zum Beispiel kann das ganze elste Buch sehr wohl ein Zusatz — wenn auch vielleicht des ersten Dichters — sein, da Odysseus eigentlich ohne jede Veranlassung in die Unterwelt hinabsteigt“. Id certe constat, majorem interpolationem, cui postea minores interpolationes adjectae sunt, jam ante Pisistrati tempora factam esse. Nam tum quum Theagenes Rheginus inter-

<sup>1)</sup> Nitzschius in comm. ad Odysseam p. 191.

<sup>2)</sup> Dr. Ludwig Friedländer, Die homerische Kritik von Wolf bis Grote. Berlin, 1853.

pretationes allegoricas Homeri, Hipponax parodias Homericas scripserunt, majores interpolationes non iam irrepere potuerunt, sed ex illo tempore carmina Homerica ut in antiquissima sua integritate servarentur, et publice et a viris doctis cautum est, quam ob rem mihi non arridet sententia Ciceronis, qui de Orat. 3, 34, 137: Pisistratus, inquit, primus Homeri libros confusos antea, sic disposuisse dicitur, ut nunc habemus. —

## §. II.

### De situ Orci.

Consideratis versibus 490 — 91 libri X:

*καὶ ἰκέσται εἰς Ἄϊδαο δόμους*

Ulixem in Orcum ipsum descendisse opinabimur, sed re vera id non fecit. Ut postea Graeci tartarum media in parte terrae esse opinabantur, cujus fidei exemplum videmus apud Aeschylum in choro Eumenidum v. 253 — 255:

*μέγας γὰρ Αἰδῆς ἐστὶν εὐθυνοὺς βροτῶν ἐνεργε  
χθονός, δελτογράφῳ δὲ πάντ' ἐπωπᾷ φρενί,*

sic etiam Homeri temporibus eadem erat sententia. Ulixes enim supra terram remansit, quum foveam faceret eique infunderet sanguinem, quo alliceret spectra. Quod quam vere dictum sit, etiam magis lucebit respecto versu 150 libri XI, ubi Tiresiam *δόμον Ἄϊδος εἶσω* ivisse legimus et vers. 627, ubi Herculem idem fecisse narratur. Ulixes ergo id quod Circe suaserat efficere non potuit, quum prope Orcum tantum proficisci posset. Quod quum intellexerimus, nobis erit magno usui perlustrantibus praecipue illos locos hujus libri, quibus Ulixes viros in Orco ipso cruciatos conspexisse dicitur. Ut autem Ulixes ad inferos veniret, regionem ad occidentem sitam petere debuit, in qua *Κερβεῖοι* aut *Κιμμέριοι* h. c. viri caliginis habitabant, et in quorum finibus introitus Orci erat, sed paullo post tam longum iter non fuisse necessarium videbimus. Fr. Aug. Wolfius<sup>1)</sup> enim contendit, in Iliade regnum infernum sub terra jacens depingi, in Odyssea autem in extremo occidenti supra Oceanum, cui

<sup>1)</sup> Wolf, Vorles. über Gesch. der Griech. Liter. p. 180.



J. H. Vossius non assentitur, qui putat, regnum infernum in media parte terrae situm habere aditum occidentalem. Voelckeri<sup>1)</sup> opinio de natura Orci non digna est de qua disputetur, quum ad suam sententiam corroborandam ipsis hujus libri locis interpolatis nitatur. Quum autem Orcus in interiore parte terrae situs esset et Ulixes in eum ingredi aut nollet aut nequiret, nulla est causa cur ad Cimmerios profisciscatur, quum imagines quovis loco ex Orco, qui Graece *Ἔρεβος* h. e. locus caliginis appellatur, ad lucem venire possent. Quid quod *εἰδωλα* apud Homerum nulla re impediuntur, quominus ad inferos veniant, quam ob rem etiam preces Elpenoris inutiles videntur? Postea aliae sententiae circumferebantur de ratione perveniendi ad Orcum, quas praecipue Lucianus<sup>2)</sup> describit, qui Orcum magnis fluminibus circumclusum esse commemorat, per quae mortui a vectore Charonte lintre transportabantur, quae ratio etiam in altera Necyia non est nota. Cerberus h. e. canis caliginis tum nondum habuit vim mortuos arcendi et Hercules, qui ejus meminit, se illum ex Orco extulisse tantum gloriatur. A poetis posteriorum aetatum discernitur Tartarus ab Elysio, quas in partes etiam Romani Orcum divisum esse putarunt. Nunc jam, postquam quo loco fuerit Ulixes et quo modo cum simulacris sermonem facere potuerit, exposui, ad singulos *Nekyias* locos explicandos accedemus, ut videamus, num certis argumentis fulta sit sententia eorum virorum doctorum, qui quamquam non totum librum tamen nonnullos locos et versus interpolatos esse contendunt aut eorum, qui totum librum ita constructum esse putant, ut omnino omitteri possit. Tertia sententia eorum qui omnia defendere multo labore et sudore student, jam a paucis respicitur. —

### §. III.

#### De exordio *Nekyias*.

Ulixes et socii bene parati ascendunt navem, et quum Circe *αἰδήσσα* ventum vela implentem mitteret, brevi

<sup>1)</sup> Bölder, Ueber hom. Geographie und Weltkunde p. 140.

<sup>2)</sup> Lucianus, de luctu §. 2—9.

tempore ad Cimmerios veniunt. Quamquam *αἰδήεις* etiam aliis locis dicitur, ut Od. V., 334, ubi Ino Leucothea praedicatur: *ἢ πρὶν μὲν ἔην βροτὸς αἰδήεσσα*, id quod Scholia explicant: *ἀνθρωπιστὶ φθεγγόμενη* et VI, 25, ubi homines *αἰδήεντες* appellantur, id quod Apollonius in lexio idem significare vult atque: *ὅτι εἰς ὀμιλίας ἦλθον ἀνθρώπων τῷ Ὀδυσσεῖ*, tamen haec explicatio nobis probari non potest. Neque cum Clarkio, qui Circen „vocalem“ dictam esse vult, consentire possumus; nam homines possunt habere epitheta, quae deorum propria sunt, sed diis virtutes eximiae non possunt tribui, quas deos habere per se constat. Quamobrem nostro loco primitus aliud adjectivum fuisse suspicari debemus, quod deinceps mutatum sit, id quod etiam conjecturis Aristophanis qui *αἰδήεσσα* et Aristotelis, qui *αἰλήεσσα* legebat, verisimilius fit et potius opinioni Nitzschii assentiendum est, antiquae linguae fuisse formam *οἰλήεσσα* = *ὀλέεσσα*. Quod si ita explicamus, statim naturam Circes cognoscemus, quae sociis Ulixis perniciose fuit aliisque et ita similis erat Acetae fratri, qui venerorum adhibendorum erat peritissimus, quam ob rem *ὀλοόφων* nominatur, cujus epitheton quo modo explicandum sit recte perspexit Buttmannus.<sup>1)</sup> *Κιμμεριοι* hic tantum commemorantur eorumque nomen idem valet ac *Κερβεριοι* h. e. viri caliginis. Apud poetas posterioris aetatis Cimmerii describuntur a Vergilio Georg. 357. III, ab Ovidio Metam. lib. XI, v. 592, a Tibullo lib. IV, eleg. i. vers. 64 ubi haec legimus:

Cimmerion etiam obscuras accessit ad arces;

queis nunquam candente dies apparuit ortu,  
sive supra terras Phoebus seu curreret infra.

In v. 23 sacrificia diis subterraneis oblata *ιερήια* appellantur, id quod jam Eustathius vituperat, qui inferias semper *τόμα* aut *ἐντομα* dici demonstrat, *ιερήια* autem illa tantum, quae diis Olympicis homines obtulerint. Non minus offendit v. 37 Genetivus *Ἐρέβους* pro *Ἐρέβους*, quae forma in singulis tantum Substantivis adhibebatur. De hujusmodi Genetivo disputavit Muetzellius.<sup>2)</sup> Sanguine effuso imagines mortuorum apparent

<sup>1)</sup> Buttmann, Mythol. II. 240.

<sup>2)</sup> Muetzellius, de emendatione Theog. Hes. pag. 52.

v. 38 — 43, quos versus ficticios esse primum inde concludere possumus, quod Zenodotus et Aristophanes eos eiicere voluerunt, quorum argumenta erant haec: enumerationem mortuorum non apte afferri, quum Homerus umbras sigillatim accedentes faciat, tum inde quod Ulixes ex Agamemnone quaesierit v. 398: *τίς νύ σε Κῆρ ἐδάμασσε τανηλεχέος θανάτοιο*, liquere mortuos non prae se tulisse vulnerum signa. *Αυτικοὶ* vero, quibus tum Eustathius et nostris temporibus Voelckerus<sup>1)</sup> assentiebantur, responderunt, generalem antecedere enumerationem (*προανακεφαλαιώσιν*), tum umbras eodem situ apparuisse, quo ex vita discesserint Sed *Αυτικῶν* argumenta contraria non habent quod nobis persuadeant, quum de natura mortuorum sententiae fuerint diversae. Potius argumentis a Nitzschio<sup>2)</sup> allatis assentiri debemus, qui versus hos interpolatos esse ratus ita argumentatur.

a. enumerationem esse inutilem et ut sit praenuntiatio non convenire cum sequentibus imaginibus, quae omnino non accedant, quum series uxorum postea appareat,

b. versui 43:

*Θεσπεσίη ἰαχῇ · ἐμὲ δὲ χλωρὸν δέος ἤρει ·*  
inepte adjungi versum 44:

*δὴ τοτ' ἐπειθ' ἐτάροισιν ἐποτρύνας ἐκέλευσα.*

c. *ψυχὴν* Elpenoris primum cognoscere Ulixem eamque ab illo cognosci in vers. 51:

*πρώτη δὲ ψυχὴ Ἑλπήνορος* etc.;

d. raro tantum in usu esse formas verborum: *βεβρωτωμένα* et *πολύτλητοι*“.

Ad haec argumenta augenda non negligendi sunt versus 225 in quibus uxores iterum accedere dicuntur. Illas semper stetisse circa Ulixem, quum loqueretur cum Elpenore, Tiresia, matre, nihil est causae quod putemus; nam certe Proserpina incitante singulae uxores ex Orco accedunt. Brausewetterus<sup>3)</sup> imagines promiscue, non ut *προμνηστίνας*

<sup>1)</sup> Voelcker, Ueber die Bedeutung von *ψυχή* und *εἶδωλον*.

<sup>2)</sup> Nitzsch, in 1. Com. 3. Odyssea III. p. 196.

<sup>3)</sup> Brausewetter, De necyia Homérica. Regimonti Pr. 1863.

se congregasse contendere voluit et foveam per totum tempus cogitandam esse umbrarum corona quasi circumdatam. Sed illius sententiae obstant versus 233, 234:

*αἱ δὲ προμνηστῖναι ἐπήϊσαν ἡδὲ ἐκάστη  
ὄν γόνον ἐξαγόρευεν.*

et pro certo putare possumus, singulas animas apparuisse, tum dicessisse, dum ipsis de sua sorte loquendi occasio fuerit. Vis Participii *οὐτάμενος* eadem est ac Part. *βεβλημένος*, quo de verbo postea disseram. —

#### §. IV.

##### De Elpenore ejusque narratione.

Quamquam tam multae animae ad foveam congregatae erant, Ulixes tamen iis ad sanguinem accedendi non dedit facultatem, priusquam Tiresiam sciscitatus esset. Cur autem id Elpenori concesserit, qui ita describitur X. vers. 552:

*Ἑλπήνωρ δὲ τις ἔσκε νεώτατος οὔτε τι λίην  
ἄλκιμος ἐν πολέμῳ οὔτε ἡρεσὶν ἦσιν ἀρηρώς.*

aut quomodo factum sit, ut quamquam sanguinem non biberat colloqui posset cum Ulixem, non est unde cognoscatur. Koës<sup>1)</sup> quidem id fieri potuisse vult, quia natura Elpenoris ab ceterorum in Orco habitantium mortuorum diversa fuerit. At si omnino ibi esse potuit, quae illa diversitas fuerit difficile est intellectu, quum natura omnium mortuorum eadem fuerit.

Nonne Ulixes habuit potestatem, arcendi istum hominem, cujus ipse antea minus gloriose meminerat? Ulixes qui ea tantum spe incitatus fines Orci petiverat, ut de celerrima domum redeundi ratione certior fieret, primum cum Tiresia de rebus minoris momenti loquitur et ita quominus finem itineris in Orcum facti acceleret impeditur. Quodsi reputamus, non facere possumus quin illos recte judicasse existimemus, qui colloquium Elpenoris interpolatum esse con-jiciant.

Sed etiam majora argumenta habemus in verbis et Elpenoris et Ulixis inter se dissentientibus, quae illam sen-

<sup>1)</sup> G. H. C. Koës, commentatio de discrepantiis quibusdam in Odyssea occurrentibus. Hafniae 1806. p. 37.



tentiam certissimam esse demonstrant. Ulixes enim Phaeacibus se cadaver Elpenoris in domo Circes reliquisse narrat v. 53:

*σῶμα γὰρ ἐν Κίρκης μεγάρῳ κατελείπομεν ἡμεῖς*

et sic iudicat, se jam scivisse Elpenorem mortuum esse, quare quaestio v. 57, 58 inutilis est, quum id experiri velit, quod iam scivit. Respiciendum quoque est *σῶμα*, quod apud Homerum dicitur tantum de cadavere, id quod jam animadvertit Aristarchus et cui rei mentionem facit Lehrsius.<sup>1)</sup> Apollonius lex. H. p. 754 ita loquitur: 'Ὁ Ἀρίσταρχος παρατετήρηκε τὸ σύνθηθες Ὀμήρῳ καὶ σεσημειώται διπλῇ ὅτι σῶμα οὐδέποτε Ὀμηρος ἐπὶ τοῦ ζῶντος εἶρηκεν. Homerum de vivo corpore dicere *δέμας* et per se patet et illustratur his Plutarchi poes. Hom. c. 124 et c. 128 v. Schol. A. 115 (quod est Porphyrii) T, 23. Ulixes tum quaerit v. 57: Ἐλπήνορ, πῶς ἦλθες ὑπὸ ζόφον ἡρώεντα; et quum ita audire velit, quo modo aut qua via in Orcum venerit; nam particula *πῶς* explicatur versibus sequentibus:

*ἔφθης πεζὸς ἐὼν ἢ ἐγὼ σὺν νηὶ μελαίνῃ;*

et respondere debuerit ita fere ut chorus Eumenidum apud Aeschylum v. 250:

*ὑπὲρ τε πόντον ἀπέρους πωτήμασιν  
ἦλθον διώκονσ', οὐδὲν ὑστέρᾳ νεώς,*

homo ineptus Ulixem quaerentem non intellexit, quamobrem narrat, qua ratione mortuus sit, id quod Ulixi jam notum erat, sed nondum sepelire potuit, *ἐπεὶ πόντος ἄλλος ἐπειγεν*, quod non verisimile esse videtur, Ulixi non tantum fuisse temporis, ut socio ultimum officium praestaret. Omnino autem nihil est causae cur poeta Elpenorem quid sibi acciderit narrantem faciat, quum Ulixes lib. X. v. 552—560 haec omnia cum Phaeacibus communicaverit. Non necessaria est v. 66 adiectio: *οὐ παρεόντων*, quae explicet: *τῶν ὄπιθεν* et sensus versus 68 facile falso intelligi potest; nam *μῦθος*, nisi cum alio substantivo coniungitur, significat

<sup>1)</sup> Lehrs, De Aristarchi studiis Homericis. Reg. Pr. 1833.

Telemachum solum domi relictum fuisse, id quod poeta hic non dictum esse vult, quia supplenda est vox: *νίδς*, ut conjunctim invenimus *μῦθον νίδν* in libro XVI. v. 118—20. Sin Elpenor v. 69, 70 dicit:

*οἶδα γὰρ ὡς ἐνθ' ἐνδε κίων δόμου ἐξ Ἀτῖδαι  
νῆσον ἐς Αἰαθὴν σχήσεις εὐεργέα νῆα,*

aperte aliquid falsi pronuntiat; nam socii quo iter fieret primum in navi experti sunt, quum ipse jam mortuus esset. Nitzschii<sup>1)</sup> sententia, qui *οἶδα* ita interpretatur: *οἶδα* hat öfters den Sinn einer zwar starfen, aber immer nur subjectiven Ueberzeugung, eines festen Glaubens, non habet quod nobis persuadeat et refutata est a Lauerò,<sup>2)</sup> qui locos Od. X. 267. XIV. 365. Il. IV. 163 a Nitzschio ad suam explicationem corroborandam adhibitos primum rejicit et tum ita pergit: Tantum vero abest ut causa inveniatur, qua commotus aliquam Elpenor de Ulixis ad Circeam reditu exsistimationem habere potuerit, ut Ulixem Circae insula praeternavigata quam brevissima via patriam esse petitum verisimile videri debuerit. Inepti quoque sunt versus 71—73, in quibus Elpenor ne ipsum indefectum et insepultum relinquant petit, quod nisi fecerint fore ut Ulixes a diis puniatur minatur; nam nusquam apud Homerum exstant loci, ex quibus eluceat, homines religione coactos fuisse, mortuos sepelire. Quae religio si jam tum valuisset, certe Achilles, qui hostes avibus diripiendos Il. I. 4 dedit, non laudatus esset et aliis Iladis locis XII. 389 et XXIV. 593 mortui statim in Orcum abeunt et Il. XXIII. v. 19 et 179 Achilles, quamquam Patroclus nondum sepultus erat, evocat:

*Χαῖρέ μοι, ὦ Πάτροκλε, καὶ ἐν Ἀτῖδαι δόμοισι.*

Ex omnibus his versibus recentiores opiniones antiquioribus temporibus suppositas esse videmus. Postremo Elpenor petit, ut sibi in tumulo remus figatur, ut ubi jaceat postea cognoscatur. Ex hisce verbis nonnulli concluderunt, tum fuisse

<sup>1)</sup> Nitzsch, l. c. III. p. 201.

<sup>2)</sup> S. Fr. Lauer, De Odysseae libro undecimo quaestionum caput primum Berolini 1843.

morem apud Graecos signa in tumulis mortuorum statuendi, sed nusquam talis mos commemoratur et persuadendi vim habent neque epigramma Sapphus in Palat. Anthol. VIII. 505 neque ille ab Aristotele<sup>1)</sup> citatus mos Iberorum, tot verua circa sepulera collocandi, quot hostes mortuus interfecerit. Sed nunc jam satis de Elpenore disputasse et id explicuisse mihi videor, tantas causas adesse ad interpolationem hujus colloquii demonstrandam, ut iam nemo hos versus suo loco positos esse contendere possit. Praeterea Lauerus, ut ostenderet, qua ratione et unde isti versus cor-rasi essent, singulos versus collectos composuit loc. cit., pag. 19. —

## §. V.

## De vaticiniis Tiresiae.

Ante Tiresiam jam in conspectum venit mater Ulixis, Anticlea, filia Autolycei, quae cum filio sermonem conferre studuit, sed ille quamquam eam delevit prohibuit, quominus ad sanguinem appropinquaret. Plutarchus<sup>2)</sup> quidem dicit, id consulto Ulixem fecisse, sed ego intelligere nequeo, qua re permotus filius sermonem cum matre praebitum ita negligere possit ut cum aliis loquatur, praesertim quum sibi ex colloquutione Tiresiae interim neglecta nihil quidquam fuisset detrimenti. Et cur potius et prius garrulo Elpenori dedit colloquii ansam quam matri? Quibus momentis com-motus facere non possum, quin istos versus subditicios esse putem, quibus interpolator id tantum efficere voluit, ut vaticinia Tiresiae, propter quae totum iter susceptum erat, jam magis illustrarentur, quae ipsa tam exilia atque tenuia erant, ut Ulixes nullo incommodo illis carere posset. Primum enim Tiresias praevidit, fore ut Ulixes κακῶς h. e. rebus adversis afflictus domum reverteretur, id quod non verum est, quum postea Ulixo dormiente navis ad Ithacam appelleretur. Ceterum Tiresias ei nulla vaticinia nuntiat excepta illa calamitate, quae ei in Trinacria occurreret, nisi boum gregibus

<sup>1)</sup> Aristoteles, Polit. VIII. 3.

<sup>2)</sup> Plutarchus, de curios. 2.

parceret; tum id narrat quod Ulixes non quaesiverat. In versu 115 enim quid in domo Ulixis agatur exponit, cujus vaticinii in libr. XIII. 386 omnino non meminisse videtur. Huc accedit quod Ulixi, qui erat πολύτροπος et qui finem errorum quam proxime affore sperabat, imperat, ut procis interfectis ad illum populum eat, qui remum putet esse vannum, ubi a scelere purgetur. Hisce verbis ergo suasit, ut Ulixes iterum, quum Ithaca parvi tantum esset spatii, mare pernavigaret, ut illum populum, cujus fines tam longe a mari abessent peteret, qua re factum esset, ut denuo in potestatem Neptuni veniret, qui ei erat quam maxime iratus. Poetam autem cogitasse, esse populum qui non noverit remos, mihi non potest persuaderi; nam omnes homines jam viderunt remos, qui non solum in mari, sed etiam in fluminibus et lacubus adhibentur. Postea quidem hoc vaticinium non oblitus erat, quum Penelopen de eo certiore faceret, sed novum iter inire non parat. Postremo vates addidit eum γῆρα ὑπο λιαρῶ ἀρημένον mortem obituro esse, id quod Ulixi qui viribus pollebat non jucundum auditu esse potuit, quamquam sortem suam aequo animo laturus esse videtur vers. 139:

τὰ μὲν ἄρ' οὖν ἐκέκλωσαν θεοὶ αὐτοί.

Mirum quoque videtur quod Ulixes interrogat vers. 144:

εἰπέ, ἄναξ, πῶς κέν με ἀναγνοίη τὸν ἔοντα;

nam ipse v. 50 nemini ut sanguinem biberet permisit gladio a femore stricto et ita jam scivisse videtur eam rationem, qua cognoscatur ab animabus mortuorum. Ex eo autem quod Tiresias sanguine egebat, ut loqui posset, Ulixes jam satis perspexerat, id quod interrogaverat, et versus ita non solum inutiles sunt, sed etiam subditi esse videntur, quum et poëtae superflua dicere non liceat.

## §. VI.

## De colloquio Ulixis cum matre Anticlea.

Tiresia in Orcum reverso tandem mater quam cupidissime desideratam cum filio loquendi ansam nacta est et sic fatur v. 155:

τέκνον ἐμόν, πῶς ἤλθες ὑπὸ ζόφον ἡερόεντα ζωὸς ἑών;

Hic significat particula *πῶς* non „quo modo“, sed „quo consilio adductus“; nam particulae vis liquet et ex *ζῶδς ἑών*, quia periculosum est haec tristia loca ab hominibus vivis conspici, et ex verbis Ulixis respondentibus in v. 164:

*μητρὲς ἐμῇ, χρεῖά μὲ κατήγαγεν εἰς Αἶδαο.*

Certe autem versus 156—160 interpolati sunt, quibus aditus ad Orcum describitur; nam temporibus Homeri Orcus nondum inclusus fluminibus et Oceano cogitabatur, ut mortuis ad illa impedimenta superanda linter necessaria esset. Quod verum esse iam ex crebris carminum Homericorum locis intelleximus, quibus illorum impedimentorum nulla fit mentio. Non minus suspecti sunt versus 160—163:

*γῆν τε καὶ ἐτάροισιν*

quamobrem Doederleinus<sup>1)</sup> ita scribendum esse conjicit:

*γῆν τε σὺν ἐτάροισιν;*

nam etiamsi recte dici possit: *γῆν ἀλώμενος* h. e. in navi circumerrans, tamen si haec verba conjunguntur cum *ἐτάροισιν*, certe necessaria est praepositio comitans „σύν“. Postquam Ulixes matri interroganti, num jam viderit patriam, respondit, se nondum in Achaia fuisse, quaerit quomodo se habeant et uxor et filius. Tum mater narrat, eum a Penelope per noctes in aedibus flente exspectari, quae nondum alius viri eximii uxor facta sit et maritum suum, patrem Ulixis, jam semper gravi morbo defectum esse. Haec omnia Anticlea ita nuntiat filio, quasi illo momento quo cum eo loquatur fiant, id quod ipsa scire non potuit, quum jam multos annos mortua esset et ex illo tempore res facillime mutari possent. Praecipuae autem sunt offensioni versus 184—186, quibus illa Telemachum ita celebrat:

— *ἀλλὰ ἐκῆλος*

*Τηλέμαχος τεμένην νέμεται καὶ δαίτας ἔσας  
δαίνυνται, ὅς ἐπέοικε δικάσπολον ἄνδρ' ἀλεγύνειν.  
πάντες γὰρ καλέουσιν.*

Telemachus enim, quem Ulixes *ἐπὶ μαζῇ* uxoris v. 449 reliquerat, nondum vicesimum annum superaverat et jam

<sup>1)</sup> Doederlein, de brachylogia serm. graec. et lat. p. 5.

jurisdictionis potestatem habere dicitur, quod mihi non verisimile videtur; nam non quicumque erat filius regis, postea regnum suscepit, sed is tantum qui ingenii virtutibus aliis excellebat. Quum autem Anticlea moreretur, Telemachus certe nondum hujus honoris particeps erat, quamobrem id illa scire non potuit. Ita ergo interpolatos se ipsi versus prodiderunt! Difficultatem quandam praebent verba:

*πάντες γὰρ καλέουσιν,*

quae ita explicari possunt: Telemachus convivia aequalia eam ob rem largitur, quod eum omnes ad eadem convivia invitant aut: convivia largitur, quia eum omnes evocant ad controversias dirimendas. Si alteram explicationem sequamur, facile intelligemus, id fieri non potuisse, quia Ithacenses se talibus conviviis ad causam Telemachi adjungi putare poterint; si primam, Telemachus certe auctoritati suae firmandae magis nocuisset quam profuisset, quia regi tam familiariter cum aliis vivere non licuit. In codice Hamburgensi legitur: *κοτέουσιν* pro *καλέουσιν*, sed hoc verbo sensus hujus versus non corrigitur, quia Anticlea non jam vivebat, quum proci Penelopen uxorem ducere et resistentem eo quod in ejus domo sedebant frangere voluerunt. Maximae verisimilitudinis speciem prae se fert conjectura Nitzschii,<sup>1)</sup> qui *κομέουσιν* legere vult; nam id intelligere possumus, Ithacenses gratos et benignos fuisse, quia animos ad memoriam omnium eorum beneficiorum revocabant, quae ipsis a Laerte et Ulixee regibus collata erant. Quum Ulixes matrem per vim retinere frustra laboraverit illaque explicuerit, eum non a Proserpina illudi, sed id fieri propter naturam manium v. 218:

*ἀλλ' αὐτῇ δίκη ἐστὶ βροτῶν, ὅτε κέν τε θάνωσιν,*  
iterum animae mortuorum in lucem veniunt v. 227:

*ὅσσοι ἀριστήων ἄλοχοι ἔσαν ἠδὲ θύγατρες*  
ita ut v. 38. Postea autem singulae tantum ad sanguinem accedunt et loquuntur, qua ex re non solum versus supra citatos et explicitos, sed etiam hos interpolatos esse videmus.

<sup>1)</sup> Nitzsch, l. c. p. 220.

## §. VII.

## De catalogo heroidum.

Hic *κατάλογος γυναικῶν* jam dudum in contentione atque controversia versatus erat. Nam cur Ulixes heroides citaverit non potest intelligi, quum ei nihil dicant de ratione qua facillime domum venire possit, sed de suo tantum genere gloriantur. Ipse Nitzschius catalogum nonnullis locis auctum fuisse concedit. Causam autem, quod heroides in scenam prodeant, ex eo deducere, quod Anticleae id permissum fuerit, nolim. Id enim infirmis tantum nititur argumentis, quum ejus colloquium multis rationibus non verisimilibus laborare exposuerimus. Etiam si Ulixem ut cum heroibus loqueretur cupere potuisse intelligamus, ut aut illos viros, qui virtutibus suis tota Graecia celebrabantur cognosceret aut socios, quibuscum tam multa pericula subierat, reviseret, tamen virum dedecebat cum uxoribus loqui; quibus quominus iter acceleraret prohibitus est. Sententia eorum qui id factum esse putant, quia poetae tales genealogiarum catalogi in manu fuerint, id confirmatur, quod jam antea contendimus, *Νεκύειαν* esse posteriorum temporum; nam post Homerum et praecipue per Hesiodum tales genealogiae collectae atque compositae sunt. Sed etiam ipsae heroidum narrationes, ut postea videbimus, et cum aliis carminum Homericorum locis et cum opinionibus, quae postea de diis atque deabus circumferebantur, ita dissentiunt, ut catalogum interpolatum esse paene certo affirmare possimus. Primum v. 235 Ulixes vidit inclytam Tyro, filiam Salmonei, cui se assimilavit Neptunus ibique v. 246 interpolatus est; nam priora verba: *λύσε δὲ παρθενίην ζώνην* sequentibus: *κατὰ δ' ὕπνον ἔχευεν* tolluntur. Tum v. 260 vidit Antiopen, matrem Amphionis et Zethi, qui v. 263 ita praedicantur:

*οἱ πρῶτοι Θήβης ἔδος ἔκτισαν ἐπαπύλοιο.*

Sed hi versus sententiis aliorum scriptorum, praecipue Pausaniae IX. 5 contradicunt, qui dicit, Thebas conditas esse a Cadmo ibique primum Polydorum et Labdacum regnasse, postea rege Laïo, qui Lyco tutore utebatur, ab Amphione

et Zetho Thebas expugnatas esse. Alii narraverunt Thebas, quae a Phlegysis deletae fuerint, illis jam dudum mortuis a Cadmo iterum exstructas esse, qua fabula ostendere voluerunt, non filios Antiopes, sed Cadmum revera condidisse Thebas septem portis ornatas. Deinde in conspectum venit vers. 266 Alcmene, uxor Amphitryonis, mater Herculis, qui v. 267 *Θρασυμένων, Θυμολέων* appellatur, quae attributa hos versus esse suspectos ostendunt; nam locis Od. XI. 261—26 et Iliad. VIII. 362—69 exceptis nusquam per Homerum rerum ab Hercule praeclare gestarum mentio fit. Quin etiam in Od. XXI. 7 ubi eum Iphitum hospitem interfecisse narratur, ita verbis castigatur, ut Homerum de eo non optime sensisse constet. In Iliade V. v. 640 filius Herculis, Tlepolemus, qui quidem magnopere gloriatur, breviter tantum commemoratur, quum paullo post a Sarpedone interficiatur. Posteriore demum tempore Herculi cultus offerebatur a nonnullis pagis, quorum causa hi versus quibus heros celebratur interpolati esse videntur. — Postea v. 271 Ulixes conspicit Epicasten, matrem Oedipodis, quae propter inscitiam uxor filii facta est. Suspectum est adverbium „*ἄρα*“ quod non significat „statim,“ sed „non multo post.“ Versus ergo:

*ἄρα δ' ἀνέπευστα θεοὶ θέσαν ἀνθρώποισιν*

illam fabulam tollent, quae Oedipodi matrem quattuor liberos peperisse narrat; nam si per tot annos incestus non cognitus fuisset, Homerus non dicere potuit *ἄρα*. In alio carmine epico quod Oedipodeia appellatur, illa fabula mutata narratur, Oedipum non ex matre, sed ex altera conjugē habuisse istos quattuor liberos. Postquam sortem Epicastes et vitam Chloridis v. 281 memoravit, vidit etiam v. 298 Ledam, conjugem Tyndarei, quae verbis:

*ἢ ὅ' ὑπὸ Τυνδαρέω κρατερόφρονε γείνατο παῖδε*

Tyndareo ipsi Castorem et Pollucem peperisse praedicatur. Sed aliis locis istos Jovis ipsius filios esse narratur, ut Hesiodus quoque eos describit. Versus 301 non est necessarius, quum sequentibus versibus idem melius et clarius dicatur, tum quoque relativum *οὗ* ostendit, versum 302 statim ad-



jungendum esse ad v. 300. Non minus suspectum est perpeccum *λελόγχασι*, cujus paenultima syllaba hoc loco correpta est. Porro vidit v. 305 Iphimedium, matrem Oti et Ephialtis, qui et pulcherrimi et magno erant robore, quo eorum animi ita sublatis sunt, ut ipsis diis se eos in Olympo aggressuros esse minarentur. Quod ut efficerent, Ossam Olympo et Ossae Pelium nemorosum imponere voluerunt, sed id non fecerunt, quia a Jove interfecti sunt; id enim iis in animo tantum erat; quia *μέμασαν* non significat: conati sunt, sed: moliti sunt. Cur montem monti imponere velint, ut deos consequantur, non liquet; nam v. 312 dii in Olympo habitare dicuntur atque *Ὀλύμπος* et *οὐρανός* idem valent, quia cacumina Olympi, montis Macedoniae, nubes excedere cogitantur, quamobrem fratres, simulatque ascenderunt Olympum, statim bellum cum diis conserere potuerunt. Lehrs<sup>1)</sup> hunc locum ita explicat. Olympum ascendunt Aloidae; tum dii illos fugientes in altiora coeli aufugiunt; quae coeli altiora ut et ipsi ascendere possint, quum aera sine machinis ascendere non possint, montes superstruere moliantur. Sed si Olympus altiora coeli excedit, non intelligi potest, quo dii aufugere potuerint, qui jam nihil aliud facere potuerunt nisi ut sedibus relictis in aere circumvolarent. Sensus hujus loci ut melius intelligatur, conferatur Lehrs p. 167, ubi *οὐρανός*, *Ὀλύμπος*, *αἰθήρ*, *αἴθερ* discernuntur. Inusitatus est quoque accusativus *γένυς*.

Sequentes versus 320, quibus Phaedra, Procris, Ariadne apparuisse dicuntur, sunt subditi aut certe suspecti, quia ibi uxores Atticae connectuntur et ita indicant, hujus loci auctores fuisse *διασκευαστάς*.

Injuria Minos *ὀλοόφρων* appellatur, id quod significat: atrox, severus; nam in Oreo potius rex benignus atque justus alio loco a poeta praedicatur. Difficultatem quandam v. 321—25 attulerunt, qui quomodo explicari possint non dilucidum est. Theseus enim Ariadne Athenas ducturus erat; nam imperf. *ἦγε* significat: erat in eo ut duceret,

<sup>1)</sup> Lehrs, l. c. p. 176.

quod vel inde cognosci potest, quod Ariadne nunquam Athenas venit, sed in insula Naxo a Diana interfecta est. Quamobrem id factum sit, ea de re dissentiunt scriptores. Alii Ariadnen occisam esse *μαρτυρήσει Διονύσου* contendunt, quia Theseus se ei adjunxerit, id quod Dionysus Dianae prodiderit; alii et in his Pherecydes dicunt, Ariadnen mortem obiisse, quia cum Baccho ipso castitatem violaverit, quamobrem legunt: *Διονύσου μαρτυρήσιν*, id quod verisimile esse potest, quum istud substantivum et eundem sonum et numerum syllabarum habeat et sensum in melius redigat. Pro *ἔστα* etiam legitur: *ἔπεσχε θανάτω*, quibus verbis idem exprimitur. Mirum item videtur breve *ο* in *Διονύσου*; nam plerumque in epicis legitur: *Διωνύσου*. Certe his in versibus habemus interpolationem Atticam, quae a Theseo Ariadnen relictam esse non vult fide violata, sed id factum esse ostendit, quia Ariadne ipsa dissociationis causa fuerit. Postremo vers. 325—30 Ulixes vidit Maeram Clymenam, Eriphylen, quae in *Νόστοις* Hagiae Troezenii praedicatae erant et nostro loco eam ob causam interpolatae sunt, ut heroidum ante Ledam, dioscuros, tres uxores Atticas commemoratarum meminerint lectores. Prima enim, mater Locri, qui Thebas cum Amphione et Zetho habitasse dicitur in memoriam reducit Antiope v. 260; altera, uxor Phylaci et mater Iphicli, fabulam de Pero v. 287, tertia, conjux Amphiarai, qui contra Thebas profectus est, Thebas commonefacit. —

#### §. VIII.

##### De interloquutione Ulixis et Phaeacum.

Postquam Ulixes usque ad v. 330 historiam heroidum aut ipsas loquentes fecit aut ipse narravit, jam fabulas enarrare desinere vult, quia tempus dormiendi moneat et per ambages interrogat, utrum ad navem discedat an in domo Alcinoi maneat. Sed nemo quaerenti respondit, omnesque intentionis silentio tenebantur, dum Arete, cui hospes non minus placere videtur quam filiae Nausicaae, quae optavit lib. VI. v. 244:

αἱ γὰρ ἐμοὶ τοιόσδε πόσις κεκλημένος εἴη  
ἐνθάδε ναιετάων, καὶ οἱ ἔδοι αὐτόθι μῖμνεν·

Ulixes laudato Phaeacas alloquatur v. 339:

τῷ μὴ ἐπειγόμενοι ἀποπέμπετε μηδὲ τὰ δῶρα  
οὕτω χρητίζοντι κολούετε·

Haec verba autem dissentiunt cum lib. VIII. v. 423, ubi Alcinous uxorem dona hospiti colligere jubet et cum v. 433—42, ubi Areten imperata effecisse narratur v. 438:

τόσσα δ' ἄρ' Ἀρήτη ξείνῳ περικαλλέα χηλὼν  
ἐξέφερεν θαλαμιοιο, τίθει δ' ἐνὶ κάλλιμα δῶρα,  
ἐσθλήτα χρυσὸν τε, τὰ οἱ Φαίηκες ἔδωκαν.

Nisi articulus „τὰ“ positus esset, diceremus, Alcinoium etiam majora dona hospiti fuisse daturum, sed τὰ δῶρα significant certa dona, quae cuique discedenti hospiti dabantur. Post Echeneia, qui reginam laudaverat, Alcinous non respondit ad id, quod Ulixes interrogaverat, sed ut iter in crastinum diem differatur decernit, quod nocte irruente per se liquebat, et Ulixes se iam totum annum apud eum mansurum esse fatetur, quae verba aperte desiderio quam celerime Ithacam visendi contradicunt. Tum Alcinous se Ulixem impostorem atque fallacem hominem, cujus generis tam multi circumvagantur, non putare pronuntiat, quamquam talem μορφήν ἐπέων habeat, ut facillime hominibus etiam de re falsa persuadere possit eumque hortatur ut jam aliorum historiam narret, quod Ulixes ut est bonus postea facit. Alcinous paene omnia tam mire dicta non credere videtur, id quod certe quoque fecerunt carminum Homericorum auditores, qui Ulixem callidum atque versutum jam ex aliis locis cognoverant. Conjunctio substantivorum μορφή ἐπέων est offensioni illamque uno alio tantum loco lib. VIII. 170 invenimus:

ἀλλὰ θεὸς μορφήν ἔπεισι στέφει.

Nec minus vers. 369 offendit:

πάντων τ' Ἀργείων σέο ἑαυτοῦ κήδεα λυγρά,  
nam omnium Argirorum sollicitudines Ulixem omnino narrare non potuisse quisque facile intelliget. Non necessarium est alterum ἅμα vers. 371, cui similem locum invenimus Od.

XV. 398. Quum omnia quae de hac interlocutione disputata sunt reputamus, facile nobis persuadebitur, illam esse subditiariam, ad quod demonstrandum jam accedit, quod iisdem versibus 333—35 etiam poeta utitur in initio libri XIII. et quod αὐτὰρ sermonem introducit, qui antecedenti oppositus est et ita statim ad illum locum adjungendus est, quo Ulixes jam de uxoribus loqui noluit. —

### §. IX.

#### De catalogo heroum.

Animabus uxorum dispersis primum Agamemnon Atrides appropinquavit, ex quo Ulixes quomodo mortuus sit quaerit v. 339—403, quos versus Aristophanes repudiavit, quia eos ex responsione Agamemnonis promptas esse sensit. De ἡέ quoque disputavit Lehrsius<sup>1)</sup> ita: tertium ἡέ disjunctivum esse intelligitur, quare sic respondetur tamquam ad duplicem interrogationem v. 406:

οὔτε μὲ γ' ἐν νήεσσι Ποσειδάων ἐδάμασσαν  
οὔτε μ' ἀνάρσιοι ἄνδρες ἐδηλίσαντ' ἐπὶ χέρσου.

At iidem versus paulum immutati recurrunt ω, 108—113, ubi Agamemnon procos interrogat:

ἢ ὑμῖν ἐν νήεσσι Ποσειδάων ἐδάμασσαν,  
ὄρσας ἀργαλέους ἀνέμους καὶ κύματα μακρὰ;  
ἢ που ἀνάρσιοι ἄνδρες ἐδηλίσαντ' ἐπὶ χέρσου  
v. 112 βοῦς περιταμνομένους ἢ δ' οἰῶν πῶεα καλὰ,  
ἡέ περὶ πτόλιος μαχεύμενοι ἡδὲ γυναικῶν.

Id certe dilucidum est, aut quaerentis aut respondentis versus esse subditiarios, quum Atrida simpliciter se non tali modo mortuum esse dicere potuerit, sed se interfectum esse ab Aegistho σὺν οὐλομένη ἀλόχῳ conjunctim agente respondere debuerit. Jam Spohnius<sup>2)</sup> animadvertit, inter hos et alios versus esse discrimen, quia Clytaemnestra simul cum Aegistho caedem effecisse videatur, ejusque sententia versibus sequentibus confirmetur, ubi Cassandram a Clytaem-

<sup>1)</sup> Lehrs, Quaestiones epicae p. 56.

<sup>2)</sup> Spohn, de extrema parte Odysseae p. 49—56.

nestra occisam esse narratur; nam quum Agamemnonem Aegisthus aggredereetur, facile fieri potuit, ut Cassandra quamvis esset infirma Atridam adjuvare vellet. Illam in conclavi fuisse videmus ex verbis *ἀμφ' ἐμοί* v. 425, quae non significant „propter me“, sed „juxta me“. Quod quum facere studeret, a Clytaemnestra, quae in conclavi caede polluto erat, necata est. Propter hiatum inter *ἥκονσα* et *ὅπα* Botheus *ἥκονσας* legere voluit. Difficultatem afferunt verba *ποτὶ γαίῃ*, quae quomodo recte explicentur non intelligitur. Hic enim transferenda sunt: in terra jacens, sed nusquam praepositionem *πρός* pro *ἐπὶ* usurpatam esse invenimus, quare melius legatur: *ποτὶ κείνῃ* ad illam manus elevans. Quid antea Agamemnon queritur, quod uxor ejus oculos non concluserit, affirmare debemus, eum nimium postulasse a duplici homicida, sed etiam quod non erat necessarium cupit, nam ita quoque in Orco venit. Versum 428 critici merito uncis incluserunt, quia ille v. 427 non explicat, sed id tantum fit versu 429—30; sensus enim est: nihil est uxore terribilius quae conjugii mortem paret. Vers. 435—440 jam Aristophanes Byzantius repudiandos esse putavit iisque addendi sunt v. 440—44; nam illis ejectis quantum discrimen sit inter Clytaemnestram, quae *οὐλομένη, δολόμητις, κυνῶπις* appellatur et inter Penelopen quae *λίην γὰρ πινυτή, περίφρων* esse praedicatur, cognosci potest. Ergo v. 444: *ἀλλ' οὐ σοίγ' ad v. 435* adjungendus est; primum enim Agamemnon Ulixi ne omnia cum uxore communicet suadet, tum autem magnopere laudat et uxorem et filium, qui ut jam in colloquio matris exposui, nondum *μετ' ἀνδρῶν ἀριθμῶ ἔζειν* potest, quia Ulixes, qui Telemachum *ἐπὶ μαζῶν* uxoris reliquerat, tredecim annos a domo aberat, unde sequitur, ut Telemachus pubertatem vix excesserit. Iterum autem verbis v. 455:

*κρύβδην μηδ' ἀναφανδὰ, φίλην ἐς πατρίδα γαίαν  
νῆα κατισχέμεναι · ἐπεὶ οὐκέτι πιστὰ γυναιξίν.*

suspicionem in Penelopen concitat, quod cur fiat non potest perspicui, quum Ulixi nihil mali ab Uxore fore jam antea dixerit. Mirum quoque videtur quod Agamemnon quaerit v. 458:

*εἴ που ἔτι ζώντος ἀκούετε παιδὸς ἐμοῖο,*

quae verba aut significant: nonne audivistis, num filius meus vivat aut Orchomeni aut Pyli aut Spartae apud Menelaum, et sic experiri vult, qua in regione Orestes versetur, quod Ulixes scire non poterat, aut habent eum sensum: audistisne filium meum jam vivere? Et Ulixes quoque eum ita quae-sivisse putavit; nam respondit v. 464: equidem nescio, utrum vivat an mortuus sit. Sin Agamemnon ita interrogavit, id ineptum esse quisque statim videat; nam ipse in Orco erat et quis ibi esset scire potuit, postremo sibi ipse respondit v. 461:

*οἱ γὰρ πω τέθνηκεν ἐπὶ χθονὶ διὸς Ὀρέστης.*

Ulixes ergo, hoc colloquium inutile esse ratus interrumpit sermonem et quid sentiat liquet ex verbis:

*κακὸν δ' ἀνεμύλια βάζειν.*

Tum v. 467 Achilles cum Patroclo et Antilocho accedit, qui audaciam Ulixis, quod in Orco descenderat, admiratur et quaerit, quo consilio ductus id fecerit. Ad quod Ulixes causam itineris explanat, et tum ne Achillem poeniteat quod in Orco sit ita eum consolatur v. 484:

*πρὶν μὲν γὰρ σε ζῶν ἐτίμεν ἴσα θεοῖσιν  
Ἀργεῖοι, νῦν αὖτε μέγα κρατεῖς νεκρῶσιν  
ἐνθάδ' ἐὼν · τῷ μῆτι θανῶν ἀκαχίζεν, Ἀχιλλεῦ.*

Sed Achilles tantum aberat ut Ulixi assentiretur ut potius responderet v. 489:

*βουλοίμην κ' ἐπάρουρος ἐὼν θητενέμεν ἄλλῳ  
ἀνδρὶ παρ' ἀκλήρῳ, ᾧ μὴ βίωτος πολὺς εἴη,  
ἢ πᾶσιν νεκρῶσιν καταφθιμένοις ἀνάσσειν.*

Ista verba non sunt apta viro Graecorum fortissimo, qui et ipse gloriatur v. 500:

*πέφνον λαὸν ἄριστον, ἀμύμων Ἀργεῖοισιν  
et qui mortem vitae ingloriosae praetulit Il. IX. 413:*

*εἰ μὲν αὖθι μένων Τρώων πόλιν ἀμφιμάχωμαι,  
ὄλετο μὲν μοι νόστος, ἀτὰρ κλέος ἄφθιτον ἔσται.*

Mirum videtur quod Achilles v. 492 quaerit, num Neoptolemus aliis pugnantibus praestiterit et num Peleus in Hellade et Pythia habeat honorem, quamquam Ulixes jam dixerat v. 481:

*οὐ γὰρ πω σχεδὸν ἦλθον Ἀχαιῖδος,*



id quod Achilles jam oblitus est. Ulixes respondit, se nihil de Peleo compertum habere, Neoptolemum autem ab Scyro prope Trojam adductum fuisse, ubi omnibus ita praestiterit, ut ab Ulixo et Nestore tantum pugna et consilio vinceretur eumque incolumen nec percussum domum rediisse. De verbo *βάλλειν* id tantum repetam, quod Lehrsius<sup>1)</sup> jam uberius exposuit: „*βάλλειν τινά* non significat apud Homerum „petere aliquem“, sed „percutere“. Duplex vocabuli *βάλλειν* perf. pass. est: *βέβλημαι* et *βεβόλημαι*: illo de corpore, hoc de animo laeso Homerus utitur“. Neoptolemus hoc loco jam pugnandi peritus fuisse praedicatur, quum et Eurypylum interfecerit et in equo ligneo fuerit. Sed huic Ulixidis narrationi obstant ipsa verba Achillis, qui filium suum Scyri educari dixit Il. XIX. vers. 326:

*ἦέ τὸν, ὃς Σκίρῳ μοι ἐνὶ τρέφεται φίλος υἱός,*  
quem ut Patroclus domum Scyro duceret optavit in eodem libro v. 330:

*σὲ δὲ τε Φθίῃνδε νέεσθαι  
ὥς ἂν μοι τὸν παῖδα θοῇ ἐνὶ νηὶ μελαίνῃ  
Σκυρόθεν ἐξαγάγῃς καὶ οἱ δείξῃς ἔκαστα.*

Achilles ergo non cogitavit, filium ad bellum arcessi posse, quia bello finito fore ut statim in patriam reduceretur speravit. Sed etiam id obscurum est, num Achilles omnino filium habere potuerit; nam quamquam Il. IX. v. 168 *Σκῦρον ἐλὼν αἰπείαν* dicitur, tamen tota Iliade illius expeditionis causam non videmus. Huc accedit, quod ex alio loco Il. 438—440:

*σοὶ δὲ μ' ἔπεμπε γέρον ἱππηλάτα Πηλεὺς  
ἡματι τῷ, ὅτε σ' ἐκ Φθίης Ἀγαμέμνονι πέμπε,  
νήπιον, οὐπω εἰ δόθ' ὁμοῖτον πολέμοιο*

*οὐδ' ἀγορεύων, ἵνα τ' ἄνδρες ἀριπρεπές τελέθουσιν,*  
concludere possumus, Achillem nunquam Scyri fuisse, quia statim ad exercitum Agememnonis missus sit. Quum autem Achilles ita juvenis esset, ut demum ante Trojam studium rei militaris inciperet, illum jam alias terras aggressum et

<sup>1)</sup> Lehrs, de Arist. stud. Hom.

filium genuisse incredibile est. Qua ratione haec fabula, Neoptolemum fuisse Achillis filium, orta sit, recte vidit Nitzschius,<sup>1)</sup> qui ita argumentatur: „Wenn wir das Wesen der einst webenden Sage richtig fassen, so schuf sie in Neoptolemus für die andern Acte des Kampfes oder mit ihnen einen andern Achill. Der junge Fürst der Doloper von Etyros wurde mehr und mehr Achill's Ebenbild, überkam seine Waffen und wurde endlich sein Sohn“.

Versus 525:

*ἡμὲν ἀνακλῖναι πυκινὸν λόχον ἢ δ' ἐπιθεῖναι*  
a Wolfio uncis inclusus est, certe quia Eustathius monet illum versum ex Il. V. v. 751 et ex Il. VIII. 395 compositum esse. Postquam Ulixes res a Neoptolemo gloriose gestas enumeravit, Achilles abibat magnis gradibus ingrediens per herbosum pratum. Cum autem pratum asphodelo obsitum, qui omnem famem et sitim depellere putabatur, in Orco ipso esse cogitaretur, Ulixes qui ibi non erat, omnino non potuit contemplari Achillem ingredientem. Post Achillem aliae animae aegritudines suas narrabant, excepto Ajace Telamonio, qui quamvis esset mortuus, Ulixi nondum ignovit, quod ab illo victus esset, quum de armis Achillis controversias agerent, quae per filios Trojanorum dijudicatae esse narrantur v. 527:

*παῖδες δὲ Τρώων δίκασαν καὶ Παλλὰς Ἀθήνη.*

Hos versus interpolatos esse ratus Aristarchus obelum apposuit ejusque causae esse huc possunt: Incredibile esse a Graecis qui controversias habuerint arcessitos esse Trojanos ad illas dirimendas et constare eos electuros fuisse viros ex suo numero. Tum autem neglecta illa causa quod hi versus non necessarii sunt, Homerus non usus esset: *παῖδες* sed potius *κοῦροι* aut *υἱές*; porro quoque Ulixes Minervam causam interitus Ajacis fuisse non dixisset. Ulixi, qui frustra Ajacem placare tentat, ab illo, qui cum aliis animabus in Erebum descendit, non respondetur.

<sup>1)</sup> Nitzsch, l. c. III. 289.

## §. X.

## De heroibus in Orco cruciatis.

Scholiasta maiorem interpolationem h. e. interpolationem in interpolatione coepisse voluit a v. 568 usque ad vers. 627. Lehrsius,<sup>1)</sup> cui et Nitzschius assentitur, hic duplicem recensione esse ratus ita argumentatur: „λ, 565 nihil obstat quominus inter seriem spuriorum fuerit. Etenim circa hunc versum longam versuum seriem pro spuria habitam scimus; in quo atheteseos initium fuerit, ex codd. perspicui nequit: quare nihil impedit quominus jam h. v. (565) fuisse putemus, non demum v. 567, ut Buttmann statuit: Sed sive hoc vidit Aristarchus sive violentius explicans tenuit ὁμῶς, ut scholiasta, certe quin vere spurii sint 565—67 nemo dubitare debet. Duplex venit in textum huius loci recensio, ut factum et ab Ar. intellectum Od. d. 280—290. Hoc loco altera recensio fuit 541—564, altera 541—546, quibus statim annexi 565—567“. Sed utcumque haec se habent, id constat, hac in parte tales opiniones proferri, quae demum erant posteriorum temporum. Statim nobis hunc locum legentibus id est suspectum, quod Ulixes se illos viros vidisse dicit alios id facientes, quod viventes fecerint, ut Minoem, Orionem, Herculem, alios etiam cruciatis propter scelera ab illis viris perpetrata, ut Tityum, Tantalum, Sisyphum. Ulixes enim Circa iubente X. 509 ad nemus Proserpinae navem appulerat ibique mortuos citavit; ergo non in Erebum, qui sub terra jacebat, descendit, quia tum Orcum descripsisset. Ad nostram sententiam confirmandam versum 628: αὐτὰρ ἐγὼν αὐτοῦ μένον ἔμπεδον afferre possumus, ut non minus v. 636, ubi socii navem ascendere iubentur et ubi Ulixem ex Erebo in lucem venisse non commemoratur. Sed etiamsi Ulixem illos viros, qui id quod in vita fecerant videre potuisse concedamus, quomodo tandem viros cruciatis conspiciere potuit? An existimandum est, Tityum cum vulneribus, Tantalum cum lacu atque arboribus, Sisyphum cum

<sup>1)</sup> Lehrs, l. c. p. 159.

ingenti lapide in lucem venisse, ut Ulixi qua ratione cruciarentur ostenderent? Id non solum ineptum est, sed etiam contradicit opinioni veterum Graecorum qui, ut jam supra ostendi, summum malum mortem esse putarunt. Primum vidit Ulixes Minoem mortuis jus dicentem et Orionem, qui per pratum asphodelo obsitum animalia persequitur eaque in montibus interficit. Montes autem in Orco fuisse nemo putabat; nam ibi pratum tantum esse cogitabatur, in quo asphodelus vigeat, quem mortui edebant. Tum aspexit Tityum, filium Gaeae, qui quod Latonae vim attulerat, a Jove ipso punitus est, ut describitur v. 577—78:

ὁ δ' ἐπ' ἔννεα καί το πέλεθρα

γῆπε δέ μιν ἐκάτερθε παρημένω ἦπαρ ἔχειρον.

Is ergo eandem poenam sustinuit ac Prometheus, cui ab aquila jecur, quod semper denuo crescebat, erosum est. Tantalus autem, convictor deorum, qui cum mortalibus ambrosiam et nectar communicavit, ita punitus esse dicitur vers. 582:

ἔστασ' ἐν λίμνῃ ἥ δὲ προσέπλαζε γενεῖω·

σταῦτο δὲ δυνάων, πύειν δ' οὐκ εἶχεν ἐλίσθαι.

Sisyphus, filius Aeoli, conditor et rex Corinthi, ut ait Pherecydes, poenam subiit, quia Jovem, qui virginem Aeginam raptam per Corinthum duxit, patri Asopo prodidit. Alii eum cum Jove ipso habuisse litem dicunt, sed in eo animus humanus omnia petens punitus esse videtur, ut in Tityo ὕβρις voluptatis et in Tantalo luxuria cruciatae sunt. Ab omnibus his viris, quos adhuc cognovimus, valde differt Hercules, qui non tristis formae speciem prae se fert, sed decoratus summo ornamento ante oculos producit. Praecipue ea opinio offendit, qua ita celebratur v. 602:

αὐτὸς δὲ μετ' ἀθανάτοισι θεοῖσι

τέρπεται ἐν θαλίῃ καὶ ἔχει καλλισφύρον Ἥβην.

Homerus enim nondum novit eam opinionem, viros mortales in numero deorum reponi. Si autem id factum est, tum corporibus humanis non privabantur, quod Herculi accidit, qui in πυρὶ combustus est. Sententia eorum, qui quod in eo erat humani esse combustum, divinam autem partim purgatam tantum esse dicunt, non potest probari.

Ex eo quod Heben uxorem duxit, quae in Iliade virgo esse celebratur nec minus ex eo, quod Herculem in numerum deorum referri Ilias nusquam meminit, hos versus subditicios esse facile perspicimus. Nostra sententia etiam testimonio Aristarchi confirmatur, qui iisdem argumentis ad hos versus rejiciendos utitur, quae quamquam jam de iis disputavi, breviter repetam. Ille ita argumentatur: Hos versus esse interpolatos 1. quia Homerus in Iliade Herculem morientem faciat itaque ejus immortalitatem non noverit, 2. quia poetae hominum corpus in tres partes in *εἶδωλον*, *ψυχὴν*, *σῶμα* dividi non notum sit, 3. quia Hebe in Iliade virgo sit, 4. quia armatura Herculis mirabilis videatur. Versum 612 etiam apud Hesiodum Theog. 228 invenimus. Etiam si concedamus, *εἶδωλον* tantum, non *ψυχὴν* in Orco fuisse, quomodo fieri potuerit, ut Hercules loqui posset non intelligitur. Sed etiam versus 615—27, qui eo tantum consilio adjuncti sunt, ut Ulixes qui non jam quidquam respondit loquendi occasionem haberet, eam ob causam sunt suspecti, quia postremo heroes commemorati non ipsi loquuntur, Hercules unus tantum quid sibi acciderit narrat et tum responsione non exspectata in Orcum revertitur. Ulixes nondum abiit, sed ut aut Thesea aut Pirithoum videret cupivit, sed magno mortuorum clamore orto aufugit. Versum 631 interpolatum esse non modo quisque facile videt, sed etiam habemus testimonium Hereae apud Plutarchum, qui jubente Pisistrato ab Onomacrito id factum esse memoriae prodidit, ut Atheniensibus blandiretur, qui certe heroem suae gentis jam ab Homero celebratum esse gaudebant et nobili superbia efferebantur. Quum autem jam antea intellexerimus, Od. XI. v. 320—34 interpolatos esse, non minus Il. III. 144 et I. 265 ab optimis criticis repudientur, nullum locum apud Homerum invenimus, quo Theseus, qui postea demum heros factus est, commemoratus sit. Ulixes ergo, qui mortuos videre iam noluit, ascendit navem et rediit ad Circen re infecta; nam id quod voluit non assecutus erat. —

Denique quum omnia quae de hoc libro disputavi respicio, concedendum est, tam multas discrepantias nobis oc-

currisse, ut si non totum librum, tamen plurimos locos interpolatos esse certissimis causis a me probatum esse putem. De nonnullis quidem locis uberius agi potuit, sed quum non licuerit omnes libros qui hac de re scripti sunt perlegere, spero fore ut quam proxime omnibus causis quae *Nexiav* aut defendere aut suspectam reddere videntur perillustratis, meam sententiam gravioribus argumentis confirmatam atque corroboratam in lucem edam. —



